

PENGAJARAN DARIPADA  
**Y A S I N**



USTAZ MUSTAZAH BAHARI

## **Pengenalan**

Alhamdulillah, segala puji bagi Allah Tuhan yang Maha Pengasih lagi Maha Penyayang. Yang mencipta alam dengan sifat-sifat-Nya yang sempurna.

Selawat dan salam ke atas junjungan mulia Nabi Muhammad s.a.w yang membawa Rahmah ke seluruh alam.

Syukur kepada Allah s.w.t yang memberi nikmat peluang untuk memberi sokongan dan khidmat kepada Darul Tafsir, Masjid Alkhair bagi menjayakan projek penghasilan bahan-bahan tafsir dan tadabbur al-Quran.

Seterusnya ucapan terima kasih kepada kepimpinan Masjid Alkhair yang memberi peluang dan kepercayaan kepada penulis untuk berkongsi sedikit ilmu yang dikurniakan Allah bagi menjayakan projek ini.

Usaha kerdil ini bertujuan untuk mengajak kaum muslimin dan muslimat kepada tadabbur ayat-ayat al-Quran yang diturunkan khas untuk umat Muhammad s.a.w.

Ia berpenampilan ringkas untuk mudah memahami intipati yang ingin disampaikan kepada kita. Ia ibarat jambatan untuk meneroka tafsiran lanjut yang boleh didapati dari kitab-kitab tafsir yang ulung. Para pembaca yang ingin mengetahui lebih lanjut akan perincian ayat-ayat yang dibaca, boleh merujuk kepada pelbagai kitab tafsir yang sedia ada.

## **Metodologi**

Bagi memastikan usaha ini berpandukan tafsiran yang betul, penulis telah mengambil beberapa rujukan asas dari kitab-kitab tafsir yang berwibawa seperti, Tafsir Ibn Kathir, Tafsir al-Qurtubi, Aysar al-Tafasir dan yang lain-lain.

Dari sudut terjemahan pula, penulis merujuk kepada beberapa terjemahan secara fizikal dan online. Selanjutnya penulis melakukan olahan yang sesuai untuk memberikan maksud yang lebih mudah difahami menurut konteks bahasa Melayu.

Penulis tidak menghuraikan lebih lanjut ayat-ayat yang jelas dan *straightforward*. Memadai dengan membaca terjemahan untuk memahami maksud ayat.

Usaha ini pasti tidak sempurna. Pasti ada banyak lagi panduan yang boleh dikongsi. Hanya yang diharapkan agar ia dapat menarik perhatian para pembaca untuk mengetahui lebih lanjut apakah lagi ilmu-ilmu yang terkandung dalam tafsiran ayat-ayat al-Quran yang boleh dijadikan pedoman untuk diamalkan.

Akhir kalam, segala yang baik datang dari Allah, yang lemah dan serba kekurangan datang dari insan yang kerdil lagi hina ini. Semoga apa yang diusahakan mendapat Rahmat dan Redha Allah s.w.t.

Mustazah Bahari

Rabiulawal 1445.

# Surah Yasin

## **Pengenalan:**

Surah Makkiyah, mengandungi 83 ayat.

## **Pengisian Surah:**

Surah ini merangkumi 3 poin utama:

- 1) Penentangan dan sikap golongan yang ingkar terhadap petunjuk Ilahi serta balasan untuk mereka.
- 2) Kejayaan dan ganjaran bagi golongan yang beriman dan menurut perintah Ilahi.
- 3) Bukti-bukti kekuasaan Allah untuk manusia hormati atau takut.

## **Kelebihan Surah Yasin:**

Dari Abi Hurairah, sabda Nabi s.a.w, “Barangsiapa yang membaca surah Yasin pada waktu malam kerana Allah, nescaya dia akan diampunkan dari dosa-dosanya.”  
(Sahih Ibn Hibban)

### **Firman Allah:**

بِسْمِ اللَّهِ الرَّحْمَنِ الرَّحِيمِ

يَسَّ (١) وَالْقُرْآنِ الْحَكِيمِ (٢) إِنَّكَ لَمِنَ الْمُرْسَلِينَ (٣) عَلَى صِرَاطٍ مُسْتَقِيمٍ (٤) تَنْزِيلَ الْعَزِيزِ الرَّحِيمِ (٥) لِنُنذِرَ قَوْمًا مَّا أُنذِرَ آبَاؤُهُمْ فَهُمْ غَافِلُونَ (٦)

1. Yaa Siin. 2. Demi Al Quran yang penuh hikmah. 3. Sungguh, engkau (Muhammad) adalah salah seorang dari para rasul. 4. (yang berada) di atas jalan yang lurus. 5. Al-Quran itu, diturunkan oleh Allah Yang Maha Kuasa, lagi Maha Mengasihani. 6. Supaya engkau memberi peringatan dan amaran kepada kaum yang datuk nenek mereka telah lama tidak diberikan peringatan dan amaran; (sebab) itulah mereka lalai.

### **Tadabbur Ayat:**

Besarnya nilai al-Quran dan benarnya perutusan Nabi Muhammad s.a.w, sehingga Allah s.w.t bersumpah dengan kemuliaan al-Quran yang penuh dengan hikmah untuk kepentingan hidup manusia. Tujuan al-Quran diturunkan dan Nabi Muhammad s.a.w diutuskan adalah untuk membawa manusia kepada kejayaan di dunia dan akhirat, bukan bertujuan untuk membebaskan dan menyusahkan.

### **Aplikasi Ayat:**

- ❖ **Hargai nikmat al-Quran dengan membaca, memahami dan mengamalkan segala panduannya.**
- ❖ **Hargai nikmat perutusan Nabi Muhammad s.a.w dengan mengikuti ajaran dan sunnah-sunnahnya.**

### **Firman Allah:**

لَقَدْ حَقَّ الْقَوْلُ عَلَى أَكْثَرِهِمْ فَهُمْ لَا يُؤْمِنُونَ (٧) إِنَّا جَعَلْنَا فِي أَعْنَاقِهِمْ أَغْلَالًا فَهِيَ إِلَى الْأَذْقَانِ فَهُمْ مُقْمَحُونَ (٨)  
وَجَعَلْنَا مِنْ بَيْنِ أَيْدِيهِمْ سَدًّا وَمِنْ خَلْفِهِمْ سَدًّا فَأَغْشَيْنَاهُمْ فَهُمْ لَا يُبْصِرُونَ (٩) وَسَوَاءٌ عَلَيْهِمْ أَأَنذَرْتَهُمْ أَمْ لَمْ تُنذِرْهُمْ  
لَا يُؤْمِنُونَ (١٠)

7. Demi sesungguhnya, telah tetap hukuman siksa ke atas kebanyakan mereka, kerana mereka tidak mahu beriman. 8. Sesungguhnya Kami jadikan (kesombongan dan keengganan mereka tunduk kepada kebenaran sebagai) belunggu yang memberkas kedua tangan mereka ke leher mereka; (lebarnya belunggu itu) sampai (meningkatkan) dagu mereka lalu menjadilah mereka terdongak.<sup>1</sup> 9. Dan Kami jadikan (sifat tamak mereka kepada harta benda dan gila pangkat itu sebagai) sekatan (yang menghalang mereka daripada memandang kepada keburukan dan kesingkatan masa dunia yang ada) di hadapan mereka, dan sekatan (yang menghalang mereka daripada memikirkan azab yang ada) di belakang mereka (pada hari kiamat), lalu Kami tutup pandangan mereka; maka dengan itu, mereka tidak dapat melihat (jalan yang benar). 10. Dan (dengan sebab itu) sama sahaja sama ada engkau beri amaran atau engkau tidak beri amaran, mereka tidak akan beriman.

### **Tadabbur Ayat:**

Sebanyak mana pun usaha dilakukan untuk menyelamatkan manusia dari kejahilan dan kebinasaan, masih tetap ada di kalangan manusia yang enggan menerima seruan yang mengajak kepada kebaikan dan kesejahteraan dirinya sendiri. Kebinasaan yang berlaku ke atas manusia adalah lantaran sikap mereka sendiri yang tidak mahu menerima kebenaran dan kebaikan, bukan kerana Allah sengaja ingin membinasakan mereka.

### **Aplikasi Ayat:**

❖ **Jangan sesekali sombong dengan teguran dan nasihat yang baik. Fikirkan sejenak apa yang disampaikan, jangan terus menolak.**

---

<sup>1</sup> Perumpaan yang menunjukkan orang yang tidak mahu beriman seperti orang yang terikat dan terbelunggu sehingga tidak dapat bergerak untuk mendapat keselesaan.

**Firman Allah:**

إِنَّمَا تُنذِرُ مَنِ اتَّبَعَ الذِّكْرَ وَحَشِيَ الرَّحْمَنَ بِالْغَيْبِ فَبَشِّرْهُ بِمَغْفِرَةٍ وَأَجْرٍ كَرِيمٍ (١١) إِنَّا نَحْنُ نُحْيِي الْمَوْتَىٰ وَنَكْتُبُ مَا قَدَّمُوا وَآثَارَهُمْ وَكُلَّ شَيْءٍ أَحْصَيْنَاهُ فِي إِمَامٍ مُّبِينٍ (١٢)

11. Sesungguhnya peringatan dan amaran (yang berkesan dan mendatangkan faedah) hanyalah yang engkau berikan kepada orang yang sedia menurut ajaran Al-Quran serta dia takut (melanggar perintah) Ar-Rahman ketika dia tidak dilihat orang dan ketika dia tidak melihat azab Tuhan. Oleh itu berilah kepadanya berita yang menggembirakan dengan keampunan dan pahala yang mulia. 12. Sesungguhnya Kami menghidupkan orang-orang yang mati, dan Kami tuliskan segala yang mereka telah kerjakan serta segala kesan perkataan dan perbuatan yang mereka tinggalkan. Dan (ingatlah) tiap-tiap sesuatu kami catitkan satu persatu dalam Kitab (Suratan) yang jelas nyata.

**Tadabbur Ayat:**

Hanya orang yang jujur pada dirinya yang mengaku diri sebagai hamba Allah, akan mudah menerima peringatan dan takut akan azab Allah sekiranya dia melanggar perintah-Nya. Sifat orang seperti itu akan terus berusaha untuk melakukan kebaikan kerana dia tahu bahawa setiap perbuatannya akan dicatit dan bakal dipersembahkan di hadapan Allah s.w.t.

**Aplikasi Ayat:**

- ❖ **Jadilah orang yang mudah menerima teguran serta nasihat dan teruskan usaha melakukan kebaikan kerana Allah semata-mata kerana kesan baiknya berterusan hingga ke akhirat.**

### **Firman Allah:**

وَاضْرِبْ لَهُم مَّثَلًا أَصْحَابَ الْقَرْيَةِ إِذْ جَاءَهَا الْمُرْسَلُونَ (١٣) إِذْ أَرْسَلْنَا إِلَيْهِمُ اثْنَيْنِ فَكَذَّبُوهُمَا فَعَزَّزْنَا بِثَالِثٍ فَقَالُوا إِنَّا إِلَيْكُم مُّرْسَلُونَ (١٤) قَالُوا مَا أَنْتُمْ إِلَّا بَشَرٌ مِثْلُنَا وَمَا أَنْزَلَ الرَّحْمَنُ مِنْ شَيْءٍ إِنْ أَنْتُمْ إِلَّا تَكْذِبُونَ (١٥) قَالُوا رَبُّنَا يَعْلَمُ إِنَّا إِلَيْكُم لَمُرْسَلُونَ (١٦) وَمَا عَلَيْنَا إِلَّا الْبَلَاغُ الْمُبِينُ (١٧) قَالُوا إِنَّا تَطَيَّرْنَا بِكُمْ لَئِن لَّمْ تَنْتَهُوا لَنَرْجِمَنَّكُمْ وَلَيَمَسَّنَّكُم مِّنَّا عَذَابٌ أَلِيمٌ (١٨) قَالُوا طَائِفُكُمْ مَعَكُمْ أَلَيْسَ ذِكْرُكُمْ بَلْ أَنْتُمْ قَوْمٌ مُّسْرِفُونَ (١٩)

13. Dan buatlah suatu perumpamaan bagi mereka, yaitu penduduk suatu negeri, ketika utusan-utusan datang kepada mereka. 14. Ketika Kami mengutus kepada mereka dua orang utusan, lalu mereka mendustakan keduanya, kemudian Kami kuatkan dengan (utusan) yang ketiga, maka ketiga utusan itu berkata, "Sungguh, kami adalah orang-orang yang diutus kepadamu." 15. Mereka (penduduk negeri) menjawab, "Kamu hanyalah manusia seperti kami dan (Allah) Yang Maha Pengasih tidak menurunkan sesuatu apa pun, kamu hanyalah pendusta belaka." 16. Mereka berkata, "Tuhan kami mengetahui bahwa sesungguhnya kami adalah utusan-utusan-(Nya). 17. Dan kewajiban kami hanyalah menyampaikan (perintah Allah) dengan jelas." 18. Mereka menjawab, "Sesungguhnya kami bernasib malang kerana kamu. Sungguh, jika kamu tidak berhenti (menyeru kami), nescaya kami rejam kamu dan kamu pasti akan merasakan siksaan yang pedih dari kami." 19. Mereka (utusan-utusan) itu berkata, "Nasib malang kamu itu adalah karena sikap kamu sendiri. Apakah kerana kamu diberi peringatan (lalu kamu bernasib malang)? Sebenarnya kamu adalah kaum yang melampaui batas.

### **Tadabbur Ayat:**

Dengan Rahmat Allah dan kasih sayang-Nya terhadap hamba-hamba-Nya, Dia mengutuskan lagi para utusan untuk memberi peluang kepada mereka kembali kepada-Nya dengan melakukan ketaatan. Boleh sahaja Allah s.w.t sifat-Nya yang Maha Perkasa membinasakan manusia yang ingkar dan degil, tetapi Dia tetap memberi peluang agar mereka bertaubat dan menginsafi kesalahan mereka. Namun, sifat orang yang degil dan enggan menerima kebenaran akan terus mencari helah dan memberi banyak alasan untuk tidak menuruti kebaikan sehingga menyalahkan pula pihak yang menyampaikan kebaikan itu.

### **Aplikasi Ayat:**

- ❖ **Hargai dan hormati orang yang menyampaikan kebaikan kepada kita seperti para ulama, guru dan asatizah.**



❖ **Jangan berputus asa dalam menyampaikan kebaikan dan pedoman kepada orang lain.**

**Trivia:**

Menurut majoriti ahli tafsir, negeri yang dimaksudkan dalam ayat ini terletak di Antakiyah, Negara Rum di zaman perutusan syariat Nabi Isa a.s. Setelah Nabi Isa dinaikkan ke langit, Allah s.w.t telah mengutus 2 utusan untuk mengajak kaum mereka kembali ke jalan Allah. Kemudian diutuskan pula seorang lagi sebagai rahmat untuk mereka kembali kepada Allah. Namun mereka tetap menolak semua perutusan itu hingga merugikan diri mereka sendiri.

### **Firman Allah:**

وَجَاءَ مِنْ أَقْصَى الْمَدِينَةِ رَجُلٌ يَسْعَى قَالَ يَا قَوْمِ اتَّبِعُوا الْمُرْسَلِينَ (٢٠) اتَّبِعُوا مَنْ لَا يَسْأَلُكُمْ أَجْرًا وَهُمْ مُهْتَدُونَ (٢١) وَمَا لِي لَا أَعْبُدُ الَّذِي فَطَرَنِي وَإِلَيْهِ تُرْجَعُونَ (٢٢) أَأَتَّخِذُ مِنْ دُونِهِ آلِهَةً إِنْ يُرِدْنِ الرَّحْمَنُ بِضُرٍّ لَا تُغْنِ عَنِّي شَفَاعَتُهُمْ شَيْئًا وَلَا يُنْقِذُونِ (٢٣) إِنِّي إِذَا لَفِي ضَلَالٍ مُبِينٍ (٢٤) إِنِّي آمَنْتُ بِرَبِّكُمْ فَاسْمِعُونِ (٢٥) قِيلَ ادْخُلِ الْجَنَّةَ قَالَ يَا لَيْتَ قَوْمِي يَعْلَمُونَ (٢٦) بِمَا غَفَرَ لِي رَبِّي وَجَعَلَنِي مِنَ الْمُكْرَمِينَ (٢٧)

20. Dan datanglah dari hujung kota, seorang lelaki dengan bergegas sambil berkata, "Wahai kaumku! Ikutilah utusan-utusan itu. 21. Ikutilah orang yang tidak meminta habuan daripadamu dan mereka adalah orang-orang yang mendapat petunjuk. 22. Dan tidak ada alasan bagiku untuk tidak menyembah (Allah) yang telah menciptakanku dan hanya kepada-Nyalah kamu akan dikembalikan. 23. Mengapa aku (perlu) menyembah tuhan-tuhan selain-Nya? (Padahal) jika (Allah) Yang Maha Pengasih menghendaki bencana kepadaku, pasti pertolongan mereka tidak berguna sama sekali bagi diriku dan mereka (juga) tidak dapat menyelamatkan aku. 24. Sesungguhnya jika aku (berbuat) begitu, pasti aku berada dalam kesesatan yang nyata. 25. Sesungguhnya aku telah beriman kepada Tuhanmu, maka dengarkanlah (pengakuan keimanan)ku. 26. Dikatakan (kepadanya), "Masuklah ke syurga." Dia berkata, "Alangkah baiknya sekiranya kaumku mengetahui. 27. Apa yang menyebabkan Tuhanku memberi ampun kepadaku dan menjadikan aku termasuk orang-orang yang telah dimuliakan."

### **Tadabbur Ayat:**

Kebenaran dan kebaikan yang disampaikan kepada manusia adalah mudah dan tidak perlu dibayar. Manusia hanya perlu akur kepada segala perintah Allah yang menciptakannya dan memberinya rezeki selama hidupnya di dunia. Orang yang mentaati perintah Allah dengan menjadi orang yang soleh dipandang mulia di sisi Allah dan manusia. Manakala orang yang menentang pula pasti akan merasai kerugian di akhirat kerana kesombongannya dari menerima kebenaran.

### **Aplikasi Ayat:**

- ❖ **Sentiasa sabar dalam mentaati perintah Allah kerana ganjaran yang disediakan bagi orang yang sabar adalah terlalu istimewa sehingga dapat melupakan segala derita yang dialami di dunia ini.**

**Trivia:**

Lelaki yang dimaksudkan di dalam ayat ini bernama Habib bin al-Najjar. Beliau adalah seorang yang berpenyakit kusta setelah sekian lama. Lalu Allah menyembuhkan penyakitnya menerusi mukjizat Nabi Isa a.s. yang dapat menyembuhkan segala penyakit dengan izin Allah. Setelah sembuh, Habib menuruti ajaran Nabi Isa a.s. dan terus mengabdikan diri kepada Allah. Apabila dia mendapat khabar bahawa kaumnya menolak dakwah yang diutuskan Allah kepada mereka, dia terus bergegas untuk memberi peringatan supaya kaumnya segera menerima dan menyahut seruan yang mulia itu.

### **Firman Allah:**

وَمَا أَنْزَلْنَا عَلَى قَوْمِهِ مِنْ بَعْدِهِ مِنْ جُنْدٍ مِنَ السَّمَاءِ وَمَا كُنَّا مُنْزِلِينَ (٢٨) إِنْ كَانَتْ إِلَّا صَيْحَةً وَاحِدَةً فَإِذَا هُمْ خَامِدُونَ (٢٩) يَا حَسْرَةً عَلَى الْعِبَادِ مَا يَأْتِيهِمْ مِنْ رَسُولٍ إِلَّا كَانُوا بِهِ يَسْتَهْزِئُونَ (٣٠) أَلَمْ يَرَوْا كَمَا أَهْلَكْنَا قَبْلَهُمْ مِنَ الْقُرُونِ أَنَّهُمْ إِلَيْهِمْ لَا يَرْجِعُونَ (٣١) وَإِنْ كُلُّ لَمَّا جَمِيعٌ لَدَيْنَا مُحْضَرُونَ (٣٢)

28. (Dan setelah dia meninggal), Kami tidak menurunkan suatu pasukan (malaikat) pun dari langit kepada kaumnya (untuk membinasakan mereka), dan Kami tidak perlu menurunkannya. 29. Tidak ada siksaan terhadap mereka melainkan dengan satu teriakan saja; maka seketika itu mereka mati. 30. Alangkah besar penyesalan terhadap hamba-hamba itu, tiap kali datang seorang rasul kepada mereka, mereka selalu memperolok-olokkannya. 31. Tidakkah mereka melihat berapa banyak umat-umat sebelum mereka yang telah Kami binasakan. Orang-orang (yang telah Kami binasakan) itu tidak ada yang kembali kepada mereka (untuk memberi peringatan). 32. Dan setiap (umat), semuanya akan dihadapkan kepada kami (di hari akhirat kelak).

### **Tadabbur Ayat:**

Apabila urusan Allah terus diperlekehkan, Dia membinasakan golongan yang ingkar dengan mudah sahaja tanpa memerlukan pasukan malaikat atau sesiapa pun untuk melakukannya. Tiada sedikit pun kerugian bagi Allah dan tidak tergunut kerajaan-Nya kerana penentangan dari manusia. Tetapi sebaliknya yang rugi adalah mereka yang ingkar dan sombong dalam menerima kebaikan.

### **Aplikasi Ayat:**

- ❖ **Dapatkan pahala dan elakkan perbuatan dosa selagi di dunia ini kerana tiada lagi peluang itu di akhirat. Siapkan bekalan dengan terus berusaha melakukan apa jua kebaikan untuk perjalanan yang jauh di alam akhirat.**

### **Firman Allah:**

وَأَيَّةٌ لَهُمُ الْأَرْضُ الْمَيْتَةُ أَحْيَيْنَاهَا وَأَخْرَجْنَا مِنْهَا حَبًّا فَمِنْهُ يَأْكُلُونَ (٣٣) وَجَعَلْنَا فِيهَا جَنَّاتٍ مِنْ نَجِيلٍ وَأَعْنَابٍ وَفَجْرْنَا فِيهَا مِنَ الْعُيُونِ (٣٤) لِيَأْكُلُوا مِنْ ثَمَرِهِ وَمَا عَمِلَتْهُ أَيْدِيهِمْ أَفَلَا يَشْكُرُونَ (٣٥) سُبْحَانَ الَّذِي خَلَقَ الْأَزْوَاجَ كُلَّهَا مِمَّا تُنبِتُ الْأَرْضُ وَمِنْ أَنْفُسِهِمْ وَمِمَّا لَا يَعْلَمُونَ (٣٦)

33. Dan salah satu tanda (kebesaran Allah) bagi mereka adalah bumi yang mati (tandus), Kami hidupkan bumi itu dan Kami keluarkan darinya biji-bijian, lalu dari (biji-bijian) itu mereka makan. 34. Dan Kami jadikan padanya di bumi itu kebun-kebun kurma dan anggur dan Kami pancarkan padanya beberapa mata air. 35. Agar mereka dapat makan dari buahnya, dan dari hasil usaha tangan mereka, maka mengapa mereka tidak bersyukur? 36. Mahasuci Allah yang telah menciptakan semuanya berpasang-pasangan, baik dari apa yang ditumbuhkan oleh bumi dan dari diri mereka sendiri mahupun dari apa yang tidak mereka ketahui.

### **Tadabbur Ayat:**

Tiada sebarang kuasa yang dapat menandingi kuasa Allah dalam penciptaan-Nya yang sempurna. Dari sekecil makhluk hingga yang paling besar, tiada kuasa yang mampu menciptanya kecuali Allah s.w.t. Manusia yang sombong dan menentang pun tidak pernah mampu untuk menciptakan apa jua ciptaan sehebat ciptaan Allah apabila dicabar oleh-Nya.

### **Aplikasi Ayat:**

- ❖ **Ucapkan zikir memuji kebesaran Allah seperti Subhanallah, Alhamdulillah, Allah Akbar.**
- ❖ **Syukuri nikmat-nikmat itu dengan mentaati perintah-Nya dan melaksanakan tanggungjawab yang diberi dengan sebaik mungkin.**

### **Firman Allah:**

وَأَيَّةٌ لَهُمُ اللَّيْلُ نَسَلَخُ مِنْهُ النَّهَارَ فَإِذَا هُمْ مُظْلِمُونَ (٣٧) وَالشَّمْسُ تَجْرِي لِمُسْتَقَرٍّ لَهَا ذَلِكَ تَفْدِيرُ الْعَزِيزِ الْعَلِيمِ (٣٨)  
وَالْقَمَرَ قَدَرْنَا مَنَازِلَ حَتَّىٰ عَادَ كَالْعُرْجُونِ الْقَدِيمِ (٣٩) لَا الشَّمْسُ يَنْبَغِي لَهَا أَنْ تُدْرِكَ الْقَمَرَ وَلَا اللَّيْلُ سَابِقُ النَّهَارِ  
وَكُلٌّ فِي فَلَكٍ يَسْبَحُونَ (٤٠)

37. Dan suatu tanda (kekuasaan Allah) bagi mereka adalah malam, Kami tanggalkan siang dari malam itu, maka seketika itu mereka (berada) dalam kegelapan. 38. Dan matahari berjalan di tempat peredarannya. Demikianlah ketetapan Allah Yang Mahaperkasa lagi Maha Mengetahui. 39. Dan telah Kami tetapkan tempat peredaran bagi bulan, sehingga (setelah ia sampai ke tempat peredaran yang terakhir) kembalilah ia seperti bentuk tandan yang tua. 40. Tidaklah mungkin bagi matahari menjejaki bulan dan malam pun tidak dapat mendahului siang. Masing-masing beredar pada garis edarnya.

### **Tadabbur Ayat:**

Ciptaan Allah s.w.t amat sempurna. Tidak pernah berlaku kesilapan pada peredaran malam dan siang dalam sejarah hidup alam ini. Semua pergerakan di angkasa lepas serta segala ciptaan-Nya di alam maya ini ditentukan kadarnya oleh Yang Maha Kuasa lagi Sempurna. Adakah terdapat di kalangan manusia yang bijak pandai sekalipun untuk menjamin kelangsungan hidup di dunia ini seperti yang dilakukan Allah s.w.t?

### **Aplikasi Ayat:**

- ❖ **Ambil sedikit masa untuk membaca dan merujuk kepada kajian sains mengenai kehebatan ciptaan Allah di langit.**
- ❖ **Lakukan aktiviti harian dengan keadilan, bertanggungjawab dan sikap bertimbang rasa untuk memelihara alam dari kesan perubahan iklim.**

### **Firman Allah:**

وَأَيُّهُمُ أَنَا حَمَلْنَا ذُرِّيَّتَهُمْ فِي الْفُلِكِ الْمَشْحُونِ (٤١) وَخَلَقْنَا لَهُمْ مِنْ مِثْلِهِ مَا يَرْكَبُونَ (٤٢) وَإِنْ نَشَأْ نُغْرِقْهُمْ فَلَا صَرِيحَ لَهُمْ وَلَا هُمْ يُنْقَذُونَ (٤٣) إِلَّا رَحْمَةً مِنَّا وَمَتَاعًا إِلَىٰ حِينٍ (٤٤) وَإِذَا قِيلَ لَهُمُ اتَّقُوا مَا بَيْنَ أَيْدِيكُمْ وَمَا خَلْفَكُمْ لَعَلَّكُمْ تُرْحَمُونَ (٤٥) وَمَا تَأْتِيهِمْ مِنْ آيَةٍ مِنْ آيَاتِ رَبِّهِمْ إِلَّا كَانُوا عَنْهَا مُعْرِضِينَ (٤٦)

41. Dan suatu tanda (kekuasaan Allah) bagi mereka adalah Kami angkut keturunan mereka dalam kapal yang penuh muatan.<sup>2</sup> 42. Dan Kami ciptakan juga untuk mereka (pengangkutan lain) seperti apa yang mereka kendarai. 43. Dan jika Kami menghendaki, Kami tenggelamkan mereka, maka tidak ada penolong bagi mereka dan tidak pula mereka diselamatkan. 44. Melainkan (Kami selamatkan mereka) kerana rahmat yang besar dari Kami dan untuk memberikan kesenangan hidup sampai waktu tertentu. 45. Dan apabila dikatakan kepada mereka, "Takutlah kamu akan siksa yang di hadapanmu (di dunia) dan azab yang akan datang (akhirat) agar kamu mendapat rahmat." 46. Dan setiap kali suatu tanda dari tanda-tanda (kebesaran) Tuhan datang kepada mereka, mereka selalu berpaling darinya.

### **Tadabbur Ayat:**

Sekali lagi diingatkan bahawa tiada siapa yang dapat menandingi kuasa Allah s.w.t yang Maha Perkasa. Jika menurut akal manusia, bahtera yang sarat dengan muatan dan dilambung ombak yang besar pasti akan memusnahkan setiap yang ada di dalamnya. Namun, tiada apa yang mustahil bagi Allah untuk melakukan apa yang dikehendaki-Nya. Tidak cukupkah bukti-bukti itu untuk menyedarkan manusia?

### **Aplikasi Ayat:**

❖ **Yakinlah bahawa hanya Allah yang dapat selamatkan manusia dalam keadaan yang amat sukar dan sulit. Hanya dengan Rahmat Allah, manusia terlepas dari kesusahan dan kesulitan hidup.**

---

<sup>2</sup> Kisah Nabi Nuh dijadikan contoh untuk mengingatkan manusia bahawa Allah sahaja yang dapat menyelamatkan manusia yang sedang mengalami keadaan yang begitu sukar dan sempit. Tiada kuasa lain dapat menyelamatkan manusia selain kuasa Allah.

### **Firman Allah:**

وَإِذَا قِيلَ لَهُمْ أَنْفِقُوا مِمَّا رَزَقَكُمُ اللَّهُ قَالَ الَّذِينَ كَفَرُوا لِلَّذِينَ آمَنُوا أَنْطَعِمُ مَنْ لَوْ يَشَاءُ اللَّهُ أَطَعَمَهُ إِنَّ أَنْتُمْ إِلَّا فِي ضَلَالٍ مُبِينٍ (٤٧) وَيَقُولُونَ مَتَى هَذَا الْوَعْدُ إِنْ كُنْتُمْ صَادِقِينَ (٤٨) مَا يَنْظُرُونَ إِلَّا صَيْحَةً وَاحِدَةً تَأْخُذُهُمْ وَهُمْ يَخِصِّمُونَ (٤٩) فَلَا يَسْتَطِيعُونَ تَوْصِيَةً وَلَا إِلَىٰ أَهْلِهِمْ يَرْجِعُونَ (٥٠)

47. Dan apabila dikatakan kepada mereka, "Infakkanlah sebahagian rezeki yang diberikan Allah kepadamu," orang-orang yang kafir itu berkata kepada orang-orang yang beriman, "Apakah perlu kami memberi makan kepada orang (miskin) yang jika Allah menghendaki Dia akan memberinya makan, kamu benar-benar dalam kesesatan yang nyata." 48. Dan mereka (orang-orang kafir) berkata, "Bilakah janji (hari kebangkitan) itu (terjadi) jika kamu orang-orang yang benar?" 49. Mereka hanya menunggu satu teriakan, yang akan membinasakan mereka ketika mereka sedang berbalah sesama mereka. 50. Sehingga mereka tidak mampu (tidak sempat) untuk membuat suatu wasiat dan mereka (juga) tidak dapat kembali kepada keluarganya.

### **Tadabbur Ayat:**

Manusia yang sombong lagi ingkar tetap wujud di mana-mana dan di zaman apa sekalipun. Ayat-ayat yang menunjukkan sifat buruk mereka itu sepatutnya menjadi tauladan kepada manusia lain agar tidak menuruti perangai dan sifat mereka, kerana kesudahan orang-orang itu adalah buruk dan merugikan diri mereka sendiri.

### **Aplikasi Ayat:**

❖ **Sentiasa bermohon kepada Allah agar diberi taufik untuk mengamalkan petunjuk-petunjuk yang tersedia ada. Doa agar Allah tetapkan hati dan jiwa di atas keimanan dan dielakkan dari kesesatan dan kesombongan.**

### **Trivia:**

Menurut ahli tafsir, orang yang kufur di dalam ayat tadi adalah Abu Jahal. Beliau menyindir Abu Bakar yang sangat pemurah dan banyak mengeluarkan infak dengan mengatakan bahawa jika Allah itu pemurah, nescaya tidak perlulah Abu Bakar dan sesiapa pun untuk mengeluarkan infak lagi. Biar Allah sahaja yang menguruskan keperluan golongan yang memerlukan. Itulah contoh sikap orang yang sombong terhadap kuasa Allah seperti hari ini juga di kalangan orang yang tidak percaya kepada kewujudan Tuhan dan kekuasaan-Nya.



**Firman Allah:**

وَنُفِخَ فِي الصُّورِ فَإِذَا هُمْ مِنَ الْأَجْدَاثِ إِلَىٰ رَبِّهِمْ يَنْسِلُونَ (٥١) قَالُوا يَا وَيْلَنَا مَنْ بَعَثَنَا مِنْ مَرْقَدِنَا هَذَا مَا وَعَدَ الرَّحْمَنُ  
وَصَدَقَ الْمُرْسَلُونَ (٥٢) إِنْ كَانَتْ إِلَّا صَيْحَةً وَاحِدَةً فَإِذَا هُمْ جَمِيعٌ لَدَيْنَا مُحْضَرُونَ (٥٣) فَالْيَوْمَ لَا تُظَلَمُ نَفْسٌ شَيْئًا  
وَلَا يُجْزَوْنَ إِلَّا مَا كُنتُمْ تَعْمَلُونَ (٥٤)

51. Lalu ditiuplah sangkalala, maka seketika itu mereka keluar dari kuburnya (dalam keadaan hidup) menuju (dengan segera) kepada Tuhannya. 52. Mereka berkata, "Celakalah kami! Siapakah yang membangkitkan kami dari tempat tidur (kubur) kami?" Inilah yang dijanjikan (Allah) Yang Maha Pengasih dan benarlah para rasul-Nya. 53. (Kebangkitan dari kubur) itu hanya dengan sekali teriakan sahaja, maka seketika itu mereka semua dihadapkan kepada Kami (untuk dihisab). 54. Maka pada hari itu seorang tidak akan dirugikan sedikit pun dan kamu tidak akan diberi balasan, kecuali sesuai dengan apa yang telah kamu kerjakan.

**Tadabbur Ayat:**

Alam akhirat yang bermula dengan alam barzakh membuktikan kebesaran Allah dalam mentadbirkan alam ciptaan-Nya. Manusia tidak mampu membayangkan bagaimana perjalanan mereka kelak di alam barzakh kemudian ke alam akhirat yang abadi. Manusia yang ingkar akan lebih takut dan cemas apabila berlaku kiamat yang besar kerana mereka tahu apa yang bakal mereka terima dari azab siksaan Allah ke atas mereka. Kiamat itu salah satu petanda bagi keadilan Allah s.w.t terhadap makhluk-Nya. Tiada siapa yang terlepas dari hukuman dan balasan dari Allah s.w.t.

**Aplikasi Ayat:**

- ❖ **Elakkan kezaliman di dunia ini kerana ia membawa kecelakaan di akhirat. Berikan hak-hak mereka yang berhak menerimanya.**

❁ **Adakah anda perasan selama membaca ayat-ayat dalam surah ini, lafaz al-Rahman diulang sebanyak 4 kali? Mengapa sifat al-Rahman itu diulang?**

Menurut ahli tafsir, lafaz al-Rahman yang diulang sebanyak 4 kali di dalam surah Yasin ini bertujuan untuk:

- Mengingatkan golongan yang ingkar bahawa Tuhan yang menciptakan dan memberi mereka rezeki itu bersifat al-Rahman. Jika tidak kerana sifat al-Rahman sudah pasti mereka hidup merana dan derita.
- Mengingatkan mereka bahawa hukum dan peraturan Tuhan yang mereka persendakan itu boleh mendatangkan kebinasaan dan kemusnahan ke atas mereka jika tiada sifat al-Rahman.
- Mengajak mereka semua untuk menghargai nikmat bertuhankan al-Rahman dengan kembali bertaubat kepada-Nya dan melakukan ketaatan serta kebaikan.

### **Firman Allah:**

إِنَّ أَصْحَابَ الْجَنَّةِ الْيَوْمَ فِي شُغْلٍ فَاكِهِونَ (٥٥) هُمْ وَأَزْوَاجُهُمْ فِي ظِلَالٍ عَلَى الْأَرَائِكِ مُتَكِئُونَ (٥٦) لَهُمْ فِيهَا فَاكِهَةٌ  
وَهُمْ مَا يَدْعُونَ (٥٧) سَلَامٌ قَوْلًا مِنْ رَبِّ رَحِيمٍ (٥٨)

55. Sesungguhnya penghuni syurga pada hari itu sibuk dalam keadaan bersenang-senang. 56. Mereka dan pasangan-pasangannya berada di tempat yang teduh, bersandar di atas pelamin-pelamin. 57. Di syurga itu mereka memperoleh buah-buahan dan memperoleh apa saja yang mereka inginkan. 58. (Kepada mereka dikatakan), "Salam," sebagai ucapan selamat dari Tuhan Yang Maha Penyayang.

### **Tadabbur Ayat:**

Jiwa manusia mana yang tidak tertarik dengan nikmat syurga. Ia merupakan ganjaran yang istimewa bagi golongan yang taat. Nikmat yang terbesar sekali bagi manusia yang taat adalah pertemuan dengan Tuhan yang menciptanya, di syurga dengan ucapan Salam yang disampaikan sendiri daripada-Nya. Sedangkan di dunia ini manusia merasa bangga apabila mendapat ucapan khas dari pemimpin negara atau orang kenamaan, bukan kah ucapan Tuhan yang Maha Kuasa lebih berharga? Hanya ahli syurga sahaja yang bakal mendapat nikmat itu.

### **Aplikasi Ayat:**

- ❖ **Sibukkan diri dengan amal kebajikan di dunia ini untuk menikmati syurga yang penuh kemeriahan.**
- ❖ **Bersabarlah dalam melaksanakan ketaatan kepada Allah. Orang yang sabar dalam keikhlasan akan mendapat ganjaran yang tidak ternilai di akhirat kelak sehingga membuatnya lupa akan segala kesusahan yang dialami di dunia.**
- ❖ **Sebarkan salam dan kesejahteraan kepada semua, mudah-mudahan ia membawa kepada kesejahteraan di akhirat kelak.**

### **Firman Allah:**

وَامْتَأْزُوا الْيَوْمَ أَيُّهَا الْمُجْرِمُونَ (٥٩) أَلَمْ أَعْهَدْ إِلَيْكُمْ يَا بَنِي آدَمَ أَنْ لَا تَعْبُدُوا الشَّيْطَانَ إِنَّهُ لَكُمْ عَدُوٌّ مُبِينٌ (٦٠)  
وَأَنْ اعْبُدُونِي هَذَا صِرَاطٌ مُسْتَقِيمٌ (٦١) وَلَقَدْ أَضَلَّ مِنْكُمْ جِبِلًّا كَثِيرًا أَفَلَمْ تَكُونُوا تَعْقِلُونَ (٦٢) هَذِهِ جَهَنَّمُ الَّتِي كُنْتُمْ  
تُوعَدُونَ (٦٣) اصْلَوْهَا الْيَوْمَ بِمَا كُنْتُمْ تَكْفُرُونَ (٦٤)

59. Dan (dikatakan kepada orang-orang yang ingkar), "Berpisahlah kamu (dari orang-orang mukmin) pada hari ini, wahai orang-orang yang berdosa. 60. Bukankah Aku telah memerintahkan kamu wahai anak cucu Adam agar kamu tidak menyembah syaitan? Sungguh, syaitan itu musuh yang nyata bagi kamu. 61. Dan hendaklah kamu menyembah-Ku. Inilah jalan yang lurus," 62. Dan sungguh, ia (syaitan itu) telah menyesatkan sebahagian besar di antara kamu. Maka apakah kamu tidak mengerti? 63. Inilah (neraka) Jahanam yang dahulu telah diperingatkan kepadamu. 64. Masuklah ke dalamnya pada hari ini kerana dahulu kamu mengingkarinya.

### **Tadabbur Ayat:**

Apa yang dilakukan dan dipilih oleh manusia di dunia bakal memberi kesan besar secara langsung di akhirat kelak. Itulah tanda kekuasaan Allah dan keadilan-Nya. Di antara punca manusia meyimpang dari kebenaran adalah kerana menuruti ajakan syaitan yang merupakan musuh ketat mereka. Syaitan mempunyai pelbagai cara untuk menyesatkan manusia dan menjerumuskan manusia ke lembah neraka. Dengan Rahmat Allah, diulang-ulang peringatan mengenai kejahatan syaitan di dalam al-Quran supaya manusia terselamat dari kejahatannya.

### **Aplikasi Ayat:**

- ❖ **Pastikan amalan dan ibadah kita benar-benar menurut apa diperintahkan oleh Allah dan diajarkan oleh Rasulullah s.a.w.**
- ❖ **Sentiasa berdoa kepada Allah serta berusaha agar diselamatkan dari tipu daya syaitan yang menyesatkan.**
- ❖ **Sentiasa berwaspada kerana tipu daya syaitan amat licik untuk menjauhkan manusia dari mendapat Rahmat Allah dengan pelbagai cara.**

### **Firman Allah:**

الْيَوْمَ نَخْتِمُ عَلَىٰ أَفْوَاهِهِمْ وَتُكَلِّمُنَا أَيْدِيهِمْ وَتَشْهَدُ أَرْجُلُهُمْ بِمَا كَانُوا يَكْسِبُونَ (٦٥) وَلَوْ نَشَاءُ لَطَمَسْنَا عَلَىٰ أَعْيُنِهِمْ فَاسْتَبَقُوا الصِّرَاطَ فَأَنَّىٰ يُبْصِرُونَ (٦٦) وَلَوْ نَشَاءُ لَمَسَخْنَاهُمْ عَلَىٰ مَكَانَتِهِمْ فَمَا اسْتَطَاعُوا مُضِيًّا وَلَا يَرْجِعُونَ (٦٧) وَمَنْ نُعَمِّرْهُ نُنَكِّسْهُ فِي الْخَلْقِ أَفَلَا يَعْقِلُونَ (٦٨)

65. Pada hari ini Kami tutup mulut mereka dan tangan mereka akan berkata kepada Kami serta kaki mereka akan memberi kesaksian terhadap apa yang dahulu mereka kerjakan. 66. Dan jika Kami menghendaki, pastilah Kami hapuskan penglihatan mata mereka; sehingga mereka berlumba-lumba (mencari) jalan. Maka bagaimana mungkin mereka dapat melihat (jalan yang lurus)? 67. Dan jika Kami menghendaki, pastilah Kami ubah bentuk mereka (menjadi binatang, batu dan lain-lain) di tempat mereka sendiri, sehingga mereka tidak mampu berjalan ke hadapan dan juga tidak mampu ke belakang. 68. Dan barang siapa Kami panjangkan umurnya niscaya Kami kembalikan dia kepada awal kejadiannya (yang serba lemah). Maka mengapa mereka tidak mengerti?

### **Tadabbur Ayat:**

Allah Maha Berkuasa untuk melakukan apa sahaja yang dikehendaki-Nya. Setiap perkara yang Allah tetapkan untuk manusia berlandaskan sifat Rahmah-Nya kerana Dia adalah Tuhan yang bersifat al-Rahman dan al-Rahim. Jika tidak kerana sifat al-Rahman, sudah pasti manusia yang ingkar dan sombong akan terus dibinasakan.

### **Aplikasi Ayat:**

- ❖ Bertakwalah kepada Allah di mana sahaja kita berada kerana anggota badan kita sendiri bakal menjadi saksi ke atas kita.
- ❖ Mintalah kepada Allah agar diberi keselamatan di akhirat serta keampunan-Nya di atas segala kelalaian dan kesalahan.
- ❖ Lihat kepada nikmat yang ada pada diri sendiri, betapa banyak kurniaan Allah yang telah diberi yang perlu disyukuri.

**Firman Allah:**

وَمَا عَلَّمْنَاهُ الشِّعْرَ وَمَا يَنْبَغِي لَهُ إِنْ هُوَ إِلَّا ذِكْرٌ وَقُرْآنٌ مُبِينٌ (٦٩) لِيُنذِرَ مَنْ كَانَ حَيًّا وَيَحِقَّ الْقَوْلُ عَلَى الْكَافِرِينَ (٧٠)

69. Dan Kami tidak mengajarkan syair kepadanya (Muhammad) dan bersyair itu tidaklah sesuai baginya. Al Quran itu tidak lain hanyalah peringatan dan kitab yang jelas. 70. Agar dia (Muhammad) memberi peringatan kepada orang-orang yang hidup (hatinya) dan agar pasti ketetapan (azab) ke atas orang-orang kafir.

**Tadabbur Ayat:**

Segala yang disampaikan oleh Nabi Muhammad s.a.w merupakan Kalam Allah yang suci dan bukan susunan kata berbentuk syair kerana Baginda bukanlah seorang penyair. Tujuan dan fungsi al-Quran adalah memberi petunjuk terbaik bagi manusia, bukan seperti syair yang sekadar menghiburkan dan melalaikan.

**Aplikasi Ayat:**

- ❖ **Hargai nikmat al-Quran di dunia ini kerana Ia tidak akan bermanfaat di akhirat bagi mereka yang mensia-siakannya.**
- ❖ **Bacalah al-Quran dan cuba usahakan untuk memahami isi kandungannya kerana Ia membentuk peribadi yang lurus dan bakal menjadi peneman di alam barzakh kelak.**

### **Firman Allah:**

أَوَلَمْ يَرَوْا أَنَّا خَلَقْنَا لَهُمْ مِمَّا عَمِلَتْ أَيْدِينَا أَنْعَامًا فَهُمْ لَهَا مَالِكُونَ (٧١) وَذَلَّلْنَاهَا لَهُمْ فَمِنْهَا رَكُوبُهُمْ وَمِنْهَا يَأْكُلُونَ (٧٢) وَلَهُمْ فِيهَا مَنَافِعُ وَمَشَارِبٌ أَفَلَا يَشْكُرُونَ (٧٣) وَاتَّخَذُوا مِنْ دُونِ اللَّهِ آلِهَةً لَعَلَّهُمْ يُنصَرُونَ (٧٤) لَا يَسْتَطِيعُونَ نَصْرَهُمْ وَهُمْ لَهُمْ جُنْدٌ مُحَضَّرُونَ (٧٥) فَلَا يَحْزُنكَ قَوْلُهُمْ إِنَّآ نَعْلَمُ مَا يُسِرُّونَ وَمَا يُعْلِنُونَ (٧٦)

71. Dan tidakkah mereka melihat bahwa Kami telah menciptakan haiwan ternakan untuk mereka, iaitu sebahagian dari apa yang telah Kami ciptakan dengan kekuasaan Kami, lalu mereka menguasainya pula? 72. Dan Kami menundukkannya (haiwan-haiwan itu) untuk mereka; lalu sebahagiannya menjadi tunggangan mereka dan sebahagian lain untuk mereka makan. 73. Dan mereka memperoleh berbagai manfaat dan minuman darinya, lalu mengapa mereka tidak bersyukur? 74. Dan mereka mengambil sembahan selain Allah agar mereka mendapat pertolongan. 75. Mereka (sembahan) itu tidak dapat menolong mereka; padahal mereka itu menjadi tentera untuk menjaga (sembahan) itu pula. 76. Maka jangan sampai ucapan (kesat) mereka membuat engkau (Muhammad) bersedih hati. Sungguh, Kami mengetahui apa yang mereka rahsiakan dan apa yang mereka nyatakan.

### **Tadabbur Ayat:**

Berapa banyak nikmat telah disediakan Allah untuk kepentingan dan kesejahteraan hidup manusia tetapi masih ada manusia yang tidak mensyukuri nikmat-nikmat itu dengan melakukan syirik terhadap Allah. Sedangkan segala bentuk pemujaan mereka kepada selain Allah tidak mampu memberi kemenangan dan keselamatan untuk mereka. Walaupun hati kecewa dengan tindakan golongan yang ingkar, jangan sampai ia merosakkan semangat untuk terus mengajak kepada kebaikan kerana terdapat insan lain yang akan menerimanya.

### **Aplikasi Ayat:**

- ❖ **Jangan sesekali mengharap dan meminta kepada selain Allah dengan apa cara sekalipun.**
- ❖ **Serahkan urusan orang yang ungkal kepada Allah s.w.t. Jangan terlalu kecewa dan berkecil hati dengan sikap mereka.**

### **Firman Allah:**

أَوَلَمْ يَرَ الْإِنْسَانُ أَنَّا خَلَقْنَاهُ مِنْ نُطْفَةٍ فَإِذَا هُوَ حَصِيمٌ مُبِينٌ (٧٧) وَضَرَبَ لَنَا مَثَلًا وَنَسِيَ خَلْقَهُ قَالَ مَنْ يُحْيِي الْعِظَامَ وَهِيَ رَمِيمٌ (٧٨) قُلْ يُحْيِيهَا الَّذِي أَنشَأَهَا أَوَّلَ مَرَّةٍ وَهُوَ بِكُلِّ خَلْقٍ عَلِيمٌ (٧٩) الَّذِي جَعَلَ لَكُم مِّنَ الشَّجَرِ الْأَخْضَرِ نَارًا فَإِذَا أَنْتُمْ مِنْهُ تُوقَدُونَ (٨٠) أَوَلَيْسَ الَّذِي خَلَقَ السَّمَاوَاتِ وَالْأَرْضَ بِقَادِرٍ عَلَىٰ أَنْ يَخْلُقَ مِثْلَهُمْ بَلَىٰ وَهُوَ الْخَلَّاقُ الْعَلِيمُ (٨١) إِنَّمَا أَمْرُهُ إِذَا أَرَادَ شَيْئًا أَنْ يَقُولَ لَهُ كُنْ فَيَكُونُ (٨٢) فَسُبْحَانَ الَّذِي فِي يَدَيْهِ مَلَكُوتُ كُلِّ شَيْءٍ وَإِلَيْهِ تُرْجَعُونَ (٨٣)

77. Dan tidakkah manusia memperhatikan bahwa Kami menciptakannya dari setitis air mani, lalu dia menjadi penentang yang nyata! 78. Dan dia (manusia yang ingkar) membuat perumpamaan untuk Kami, dan (dia sendiri) melupakan asal kejadiannya sambil berkata, "Siapakah yang dapat menghidupkan tulang-belulang, yang telah hancur luluh?" 79. Katakanlah (Muhammad), "Yang akan menghidupkannya ialah Allah yang menciptakannya kali pertama. Dan Dia Maha Mengetahui tentang segala makhluk. 80. (Dialah) Allah yang menjadikan api untukmu dari kayu yang hijau, maka seketika itu kamu nyalakan (api) dari kayu itu." 81. Dan bukankah (Allah) yang menciptakan langit dan bumi, mampu menciptakan kembali yang serupa itu (jasad mereka yang sudah hancur itu)? Benar, dan Dia Maha Pencipta lagi Maha Mengetahui. 82. Sesungguhnya perintah-Nya apabila Dia menghendaki sesuatu Dia hanya berkata, "Jadilah!" Maka jadilah sesuatu itu. 83. Maka Mahasuci (Allah) yang di tangan-Nya kekuasaan atas segala sesuatu dan kepada-Nya kamu dikembalikan.

### **Tadabbur Ayat:**

Walaupun ada manusia yang menafikan kuasa Allah menghidupkan yang telah mati, hakikatnya urusan itu amat mudah bagi Allah yang Maha Kuasa lagi Perkasa. Apabila Allah berkehendak untuk mencipta dan melakukan apa sahaja, tiada kuasa yang dapat menghalang-Nya. Akal manusia amat terhad dan tidak mampu untuk menjangkau perkara-perkara ghaib. Maha Suci Allah yang dengan kekuasaan-Nya yang Maha Sempurna, memiliki segala-galanya dan akhirnya semua ciptaan-Nya akan kembali kepada-Nya.

### **Aplikasi Ayat:**

- ❖ **Ingatlah bahawa setiap makhluk akan mati dan meninggalkan dunia yang sementara ini. Alam akhirat adalah alam yang kekal abadi.**
- ❖ **Banyak lagi keajaiban alam ini yang manusia tidak ketahui, maka janganlah berlagak sombong.**



❖ **Gunakan akal untuk mengarah jiwa kepada kebaikan, bukan mempersoalkan hukum Allah.**

**Trivia:**

Insan yang dimaksudkan di dalam ayat 77 tadi adalah pembesar Quraisy yang angkuh terhadap kuasa Allah. Beberapa riwayat menyatakan bahawa mereka adalah al-'Ashi bin Wa'il, Abu Jahal dan Ubay bin Khalaf. Diriwayatkan bahawa suatu hari, mereka telah mendatangi Nabi Muhammad s.a.w sambil memegang sebatang tulang yang reput lalu mereka memeras tulang tersebut dan mencampakkan ke udara sambil berkata, "Adakah Tuhan kamu (Muhammad) dapat membangkitkan yang ini setelah ia menjadi debu?" Nabi s.a.w bersabda, "Ya, Dia akan mematikan kamu, kemudian menghidupkan kamu lalu membangkitkan kamu untuk menuju ke neraka Jahannam." (H.R. al-Hakim dan al-Baihaqi)

Lalu turunlah ayat ini untuk mengingatkan manusia akan kesombongan yang bakal merugikan mereka kerana berani menentang dan mempersendakan kuasa Allah s.w.t.

**Catitan Peribadi Dari Surah Yasin**

- Adakah bertambah kefahaman anda tentang mesej yang disampaikan dalam surah Yasin?
- Jika masih ada lagi yang belum difahami, sila catit dan senaraikan perkara-perkara yang anda ingin fahami dengan lebih lanjut.
- Cari jawapannya dengan merujuk kepada ahli tafsir di kalangan asatizah yang bertauliah.

وَاللَّهُ أَعْلَمُ

# ***Terima Kasih***

HARAP ARTIKEL INI DAPAT MEMBERI  
MANFAAT KEPADA ANDA

اللَّهُمَّ إِنِّي أَسْأَلُكَ عِلْمًا نَافِعًا، وَرِزْقًا طَيِّبًا، وَعَمَلًا مُتَقَبَّلًا

Ya Allah, aku memohon kepada-Mu ilmu yang bermanfaat,  
rezeki yang halal dan baik, serta amal yang diterima.



**TERIMA KASIH  
KERANA  
MENYUMBANG  
KEPADA PROJEK  
TAFSIR 30 JUZ INI.**

Sokongan anda amat dihargai

Follow us on:  darultafsir.ak

**DARUL TAFSIR AL-KHAIR**